

KERATAN AKHBAR

TARIKH : 16 OGOS 2025
AKHBAR : BERITA HARIAN
MUKA : 21
SURAT

Pertumbuhan ekonomi suku kedua 4.4 peratus



Prestasi kukuh penawaran perkhidmatan, pembuatan dan pembinaan

Oleh Mahanum Abd Aziz dan Alzahrin Alias
bbbiz@nstp.com.my

Ekonomi Malaysia mencatat pertumbuhan 4.4 peratus pada suku kedua 2025 dipacu prestasi kukuh dari segi penawaran, terutama dalam sektor perkhidmatan, pembuatan dan pembinaan.

Prestasi itu menyamai pertumbuhan ekonomi Malaysia pada suku pertama.

Ini menjadikan pertumbuhan ekonomi negara bagi enam bulan pertama tahun ini berada dalam julat unjuran rasmi iaitu antara 4 hingga 4.8 peratus.

Pertumbuhan pada suku kedua itu bagaimanapun di bawah anggaran awal Jabatan Perangkaan Malaysia (DOSM) iaitu 4.5 peratus.

Ketua Perangkawan Malaysia, Datuk Seri Dr Mohd Uzir Mahidin, berkata ketahanan ekonomi Malaysia dapat dilihat melalui kekuatan permintaan domestik

berterusan didorong perbelanjaan pengguna dan pengeluaran perindustrian, walaupun permintaan luar lebih lemah.

Beliau berkata, dari segi pengguna pertumbuhan dipacu perbelanjaan musim perayaan dan aktiviti perjalanan lebih tinggi serta pelaburan yang direalisasikan dalam projek berkaitan pembinaan terutamanya pusat data.

"Gabungan pasaran buruh yang kukuh, kadar pengangguran dan inflasi rendah serta bantuan kewangan bersasar meningkatkan kuasa membeli isi rumah.

"Secara keseluruhan, perbelanjaan domestik kekal menjadi pemacu utama pertumbuhan, lantas menjadi asas yang kukuh kepada ekonomi.

"Namun, keadaan luaran terus memberikan cabaran, dipengaruhi perkembangan tarif yang berterusan serta ketidakpastian politik global berpanjangan," katanya pada sidang media Prestasi Keluaran Dalam Negara Kasar (KDNK) Malaysia Suku Kedua 2025 di Kuala Lumpur, semalam.

Turut hadir, Gabenor Bank Negara Malaysia (BNM), Datuk Seri Abdul Rasheed Ghaffour.

Pasaran pekerja positif

Sementara itu, Abdul Rasheed berkata, pertumbuhan ekonomi Malaysia suku kedua didorong permintaan dalam negeri yang kukuh dengan perbelanjaan isi rumah kekal mampan berikutan keadaan pasaran pekerja positif,



Abdul Rasheed (kanan) dan Mohd Uzir pada sidang media Prestasi Keluaran Dalam Negara Kasar Malaysia Suku Kedua di Kuala Lumpur, semalam.

(Foto Aziah Azmee/BH)

selain dasar berkaitan pendapatan, termasuk semakan kenaikan gaji minimum dan gaji penjawat awam.

Beliau berkata, pengembangan pelaburan lebih kukuh disokong pelaksanaan projek baharu dan sedia ada.

Menurutnya, dalam sektor luaran, pertumbuhan eksport lebih perlahan disebabkan, terutama oleh eksport berkaitan komoditi lebih rendah.

"Keadaan itu sebahagiannya diimbangi oleh eksport elektrik

dan elektronik (E&E) yang lebih teguh dan aktiviti pelancongan lebih giat," katanya.

Dalam pada itu, Abdul Rasheed berkata, BNM melihat tidak ada keperluan membuat semakan semula unjuran pertumbuhan KDNK bagi 2025 buat masa ini dan bank pusat itu kekal dengan unjuran yang telah disepak semula baru-baru ini, iaitu pertumbuhan antara 4 hingga 4.8 peratus.

Beliau berkata, unjuran itu telah mengambil kira pelbagai kemungkinan daripada tarif Ameri-

ka Syarikat (AS).

Katanya, dari segi keseimbangan pertumbuhan risiko, selesainya rundingan akan meredakan ketidakpastian.

Bagaimanapun, beliau tidak menolak masih ada ketidakpastian berlarutan, contohnya dari segi tarif sektoral dan perkembangan perbincangan, selain rundingan dengan beberapa negara yang belum dimuktamadkan.

"Selesainya rundingan tarif akan memberikan kepastian lebih baik kepada perniagaan, pelabur dan juga isi rumah untuk membuat keputusan lebih baik.

"Dalam unjuran pertumbuhan yang disepak semua itu (4 peratus hingga 4.8 peratus), kami telah mengambil kira pertimbangan julat kemungkinan hasil (rundingan) tarif," katanya.

Abdul Rasheed berkata, perbelanjaan isi rumah akan terus memacu pertumbuhan domestik, didorong terutama oleh pasaran buruh yang menggalakkan.

Menuju ke depan, beliau berkata, perbelanjaan isi rumah dijangka kekal berdaya tahan, disokong pekerjaan yang stabil dan pertumbuhan gaji, terutama dalam sektor berorientasikan domestik serta langkah dasar berkaitan pendapatan.

"Malahan, lembaran imbasan isi rumah kekal kukuh dan peningkatan pengalihan bantuan tunai yang disasarkan seterusnya menyokong perbelanjaan pengguna," katanya.